

樂府詩集

冊九

聖賢集

卷八

樂府詩集卷第四十二

太原

郭茂倩

編次

相和歌辭

楚調曲

怨詩二首

薛奇童

日晚梧桐落微寒入禁垣月懸三雀觀霜度萬秋門
艷舞矜新寵愁容泣舊恩不堪深殿裏簾外欲黃昏

禁苑春風起流鶯遶合懽玉窗通日氣珠箔卷輕寒
楊葉垂金一作陰砌堦花入井欄君王好長袖新作舞衣寬

同前

張洸

去年離別雁初歸今夜裁縫螢已飛征客去來音信斷
不知何處寄寒衣

同前

劉元濟

玉關芳信斷蘭閨錦字新愁來好自抑念切已含嚔虛牖風驚夢空
牀月厭人歸期儻可促勿度柳園春

同前三首

李暇

羅敷初總髻蕙芳正嬌小月落始歸船春眠恆著曉
何處期郎遊小苑花臺間相憶不可見旦復乘月還
別來花照路別後露垂葉歌舞須及時如何坐悲妾

同前二首

崔國輔

樓前桃李疎池上芙蓉落織錦猶未成蟲聲入羅幕
妾有羅衣裳秦王在時作爲舞春風多秋來不堪著

同前

孟郊

試妾與君淚兩處滴池水看取芙蓉花今年爲誰死

同前

劉義

君莫嫌醜婦醜婦死守貞山頭一怪石長作望夫名烏有並翼飛獸

有比肩行丈夫不立義豈如鳥獸情

同前

鮑溶

女蘿寄松柏綠蔓花綿綿三五定君婚結髮早移天肅肅羊雁禮冷
泠琴瑟篇恭承采蘋祀敢效同居賢皎日不留景良時如逝川秋心
還遺愛春貌無歸妍翠袖洗朱粉碧階封綺錢新人易如玉廢瑟難
爲弦寄羨薜華木榮君香閣前豈無搖落苦貴與根蒂連希君舊光
景照妾薄暮年

同前

白居易

奪寵心那慣尋思倚殿門不知移舊愛何處作新恩

同前二首

姚氏月華

春水悠悠春草綠對此思君淚相續羞將離恨向東風理盡秦箏不
成曲

與君形影分胡越玉枕終年對離別登臺北望烟雨深回身泣向寒

天月

怨歌行

班婕妤

新裂齊紈素鮮潔如霜雪裁爲合歡扇團團似明月出入君懷袖動搖微風發常恐秋節至涼飈奪炎熱棄捐篋笥中恩情中道絕

同前

曹植

爲君旣不易爲臣良獨難忠信事不顯乃有見疑患周公佐成王金縢功不刊推心輔王室二叔反流言待罪居東國泣涕當留連皇靈大動變震雷風且寒拔樹偃秋稼天威不可干素服開金縢感悟求其端公旦事旣顯成王乃哀歎吾欲竟此曲此曲悲且長今日樂相樂別後莫相忘

右一曲晉樂所奏

怨歌行朝時篇

傅玄

昭昭朝時日皎皎最明月十五入君門一別終華髮同心忽異離曠

如胡與越胡越有會時參辰遼且闊形影無髣髴音聲寂無達纖弦
感促柱觸之哀聲發情思如循環憂來不可遏塗山有餘恨詩人詠
采葛蜻蛚吟牀下回風起幽闔春榮隨路落芙蓉生木末自傷命不
遇良辰永乖別已爾可奈何譬如紈素裂孤雌翔故巢星流光景絕
魂神馳萬里甘心要同穴

怨歌行

梁簡文帝

十五頗有餘日照杏梁初蛾眉本多嫉掩鼻特成虛持此傾城貌翻
爲不肖軀秋風吹海水寒霜依玉除月光臨戶駛荷花依浪舒望簷
悲雙翼窺沼泣王餘苔生履處沒草合行人疎裂紈傷不盡歸骨恨
難祛早知長信別不避後園輿

同前

江淹

紈扇如團月出自機中素畫作秦王女乘鸞向煙霧彩色世所重雖
新不代故竊悲涼風至吹我玉階樹君子恩未畢零落委中路

同前

沈約

時屯寧易犯俗險信難羣坎壈元淑賦頓挫敬通文遽淪班姬寵夙
窆賈生墳短俗同如此長歎何足云

同前

虞世南

紫殿秋風冷彫蕤白日沈裁紈悽斷曲織素別離心掖庭羞改畫長
門不惜金寵移恩稍薄情疎恨轉深香銷翠羽帳弦斷鳳凰琴鏡前
紅粉歇堦上綠苔侵誰言掩歌扇翻作白頭吟

同前

李白

十五入漢宮花顏咲春紅君王選玉色侍寢金

一作錦

幰中薦枕嬌夕

月卷衣戀春

一作香

風寧知趙飛燕奪寵恨無窮沈憂能傷人綠鬢成

霜蓬一朝不得意世事徒爲空鸛鵲換美酒舞衣罷鵬籠寒苦不忍
言爲君奏絲桐腸斷弦亦絕悲心夜忡忡

同前

庾信

家住金陵縣前嫁得長干少年回頭望鄉淚落不知何處天邊胡塵
幾日應盡漢月何時更圓爲君能歌此曲不覺心隨斷弦

同前

此詩中有逸句

吳少微

城南有怨婦含怨倚蘭叢自謂二八時歌舞入漢宮皇恩弄幸玉堂
中綠陌黃花催夜酒錦衣羅袂逐春風建章西宮煥若神燕趙美女
二千人君王厭德不忘新況羣豔冶紛來陳是特別君不再見三十
三春長信殿長信重門晝掩關清房曉帳幽且閑綺窗蟲網氛塵色
文軒鶯對桃李顏天王貴宮不貯老浩然淚隕今來還自憐轉晚莫
試逐佳遊芳草路小腰麗女奪人奇金鞍少年曾不顧歸來誰爲夫
請謝西家婦莫辭先醉解羅襦

明月照高樓

梁武帝

圓魄當虛闔清光流思筵筵思照孤影悽怨還自憐臺鏡早生塵匣
琴又無弦悲慕屢傷節離憂亟華年君如東扶景妾似西柳煙相去

既路迴明晦亦殊懸願爲銅鐵轡以感長樂前

同前

雍陶

朗月何高高樓中簾影寒一婦獨含歎四坐誰成歡時節屢已移遊
旅杳不還滄溟儻未涸妾淚終不乾君若無定雲妾若不動山雲行
出山易山逐雲去難願爲邊塞塵因風委君顏君顏良洗多盪妾濁
水間

長門怨

柳惲

漢武帝故事曰武帝爲膠東王時長公主嫖有女欲與
王婚景帝未許後長主還宮膠東王數歲長主抱置膝
上問曰兒欲得婦否長主指左右長御百餘人皆云不
用指其女問曰阿嬌好否咲對曰好若得阿嬌作婦當
作金屋貯之長主乃苦要帝遂成婚焉漢書曰孝武陳
皇后長公主嫖女也擅寵驕貴十餘年而無子聞衛子

夫得幸幾死者數焉元光五年廢居長門宮樂府解題
曰長門怨者爲陳皇后作也后退居長門宮愁悶悲思
聞司馬相如工文章奉黃金百斤令爲解愁之辭相如
爲作長門賦帝見而傷之復得親幸後人因其賦而爲
長門怨也

玉壺夜悄悄應門重且深秋風動桂樹流月搖輕陰綺簷清露溼網
戶思蟲吟歎息下蘭閣含愁奏雅琴何由鳴曉佩復得抱宵衾無復
金屋念豈照長門心

同前

費昶

向夕千愁起自悔何嗟及愁思且歸林羅襦方掩泣絳樹搖風軟黃
鳥弄聲急金屋貯嬌時不言君不入

同前

徐賢妃

舊愛柏梁臺新寵昭陽殿守分辭方輦含情泣團扇一朝歌舞榮夙

昔詩書賤頹恩誠已矣覆水難重薦

同前

沈佺期

月皎風泠泠長門次

一作次

掖庭玉階聞墜葉羅幌見飛螢清露凝珠

綴流塵下翠屏妾心君未察愁歎劇繁星

同前

吳少微

月出映曾城孤園上太清君王春愛歇枕席涼風生怨咽不能寢蜘蛛
蟬步前楹空階白露色百草寒蟲鳴念昔金房裏猶嫌玉座輕如何
嬌所悞長夜泣恩情

同前

張翥之

長門落景盡洞房秋月明玉階草露積金屋網塵生妾妬今應改君
恩昔未平寄語臨邛客何時作賦成

同前

裴交泰

自閉長門經幾秋羅衣溼盡淚還流一種蛾眉明月夜南宮歌管北

宮愁

同前

劉阜

宮殿沈沈月欲分
昭陽更漏不堪聞
珊瑚枕上千行淚
不是思君是恨君

同前

袁暉

早知君愛歇
本自無縈妬
誰使恩情深
今來反相悞
愁眠羅帳曉
泣坐金閨暮
獨有夢中魂
猶言意如故

同前

劉言史

獨坐爐邊結夜愁
暫時恩去亦難留

一作收

手持金筯垂紅淚
亂撥寒

灰不舉頭

同前二首

李白

天回北斗挂西樓
金屋無人螢火流
月光欲到長門殿
別作深宮一

段愁

桂殿長愁不記春黃金四屋起秋塵夜懸明鏡青天上獨照長門宮裏人

同前

李華

弱體鴛鴦薦啼妝翡翠衾鴟鳴秋殿曉人靜禁門深每憶椒房寵那堪永巷陰日驚羅帶緩非復舊來心

同前

岑參

君王嫌妾妬閉妾在長門舞袖垂新寵愁眉結舊恩綠錢生履跡紅紛溼啼痕羞被桃花咲看看春獨不言

同前

齊澣

煢煢孤思逼寂寂長門夕妾妬亦非深君恩那不惜攜琴就玉階調悲聲未諧將心託明月流影入君懷

同前

劉長卿

何事長門閉珠簾只自垂月移深殿早春向後宮遲蕙草生閒地梨

花發舊枝芳菲自恩幸看却被風吹

同前

僧皎然

春風日日閉長門搖蕩春心自夢魂若遣花開只笑妾不如桃李正
無言

同前

盧綸

空宮古廊殿寒月落斜暉臥聽未央曲滿箱歌舞衣

同前

戴叔倫

自憶專房寵會居第一流移恩向何處暫妬不容收夜久絲管絕月
明宮殿秋空將舊時意長望鳳凰樓

同前

劉駕

御泉長繞鳳凰樓只是恩波別處流閒揲舞衣歸未得夜來砧杵六
宮秋

同前二首

高蟾

天上何勞萬古春君前誰是百年人
魂銷尙愧金爐燼思起猶慚玉輦塵
煙翠薄情攀不得星茫浮艷採無因
可憐明鏡來相向何似恩光朝夕新

天上鳳凰休寄夢人間鸚鵡舊堪悲
平生心緒無人識一隻金梭萬丈絲

同前

張祐

日映宮牆柳色寒笙歌遙指碧雲端
珠鉛滴盡無心語彊把花枝冷笑看

同前二首

鄭谷

閑把羅衣泣鳳凰先朝曾教舞霓裳
春來却羨庭花落得逐晴風出禁牆

流水君恩共不回杏花爭忍掃成堆
殘春未必多煙雨淚滴閑堦長綠苔

同前二首

劉氏媛

雨滴梧桐秋夜長
愁心和雨到昭陽
淚痕不學君恩斷
拭却千行更萬行

學畫蛾眉獨出羣
當時人道便承恩
經年不見君王面
花落黃昏空掩門

阿嬌怨

劉禹錫

望見葳蕤舉翠華
試開金屋掃庭花
須臾宮女傳來信
云一作言幸平

陽公主家

樂府詩集卷第四十二

東吳毛晉訂正

男展再訂